

**Kommunit inuussutissarsiutini il.il.
anigaasaliinermikkut inuussutissarsiutinik
ineriartortitseqataanissaminut periarfissaat pillugit
Inatsisartut inatsisaat naapertorlugu
inuussutissarsiutini anigaasaliinissami kommunit
Unammillersinnaanermik nakkutilliisoqarfimmut
saqqummiusseqqaartussaataanerannik
pisussaatinneqarnerat pillugu Namminersornerullutik
Oqartussat nalunaarutaat**

Unammilleqatigiinneq pillugu inatsisartut inatsisaat nr. 16, 19. november 2008-imeersumi § 13, imm. 2 malillugu aamma Unammilleqatigiinnermut Ataatsimiititaliamiit oqaaseqaateqarneratigut aalajangersarneqarpoq:

§ 1. Kommunit inuussutissarsiutini il.il. anigaasaliinermikkut inuussutissarsiutinik ineriartortitseqataanissaminut periarfissaat pillugit Inatsisartut inatsisaat naapertorlugu kommunit inuussutissarsiutini anigaasaliinissamut pilersaaruteqartut, anigaasaliinissamut pilersaarut kommunalbestyrelsimit akuerineqarnissaa sioqqullugu anigaasaliinissamut pilersaarut kommunalbestyrelsinit Unammilleqatigiinnermut Nakkutilliisoqarfimmut saqqummiunneqassaaq.

Imm. 2. Nakkutilliinermi ilisimalikkaminnik unammilleqatigiinnermik equtitsisumik tapiissuteqartoqanngitsoq pillugu sioqqutsisumik neriorsuuteqarluni Unammilleqatigiinnermut Nakkutilliisoqarfik nalunaaruteqarsinnaavoq.

Imm. 3. Pisuni Unammilleqatigiinnermut Nakkutilliisoqarfimmut ilisimatitsissutigineqartuni unammilleqatigiinneq pillugu inatsisartut inatsisaat § 12, imm. 2 malillugu unammilleqatigiinnermik equtitsisoqartoq Unammilleqatigiinnermut Nakkutilliisoqarfimmit paasineqarpat sioqqutsisumik neriorsuuteqarnissamik itigartitsinissamik Unammilleqatigiinnermut Nakkutilliisoqarfik nalunaaruteqarsinnaavoq.

Imm. 4. Sioqqutsisumik neriorsuuteqarnissamik itigartitsinissamik Unammilleqatigiinnermut Nakkutilliisoqarfup aalajangiinera kommunalbestyrelsimut kiisalu nakkutilliisoqarfimmut nalunaarutigineqassaaq. Kommunit inuussutissarsiutini il.il. anigaasaliinermikkut inuussutissarsiutinik ineriartortitseqataanissaminut periarfissaat pillugit Inatsisartut inatsisaat malillugu Nakkutilliisoqarfik anigaasaliisoqassanersoq aalajangissaaq.

Imm. 5. Inuussutissarsiutinut aningaasaliinerni Naalakkersuisunit akuerineqartussani, kommunit inuussutissarsiutini il.il. aningaasaliinermikkut inuussutissarsiutinik ineriartortitseqataanissaminut periarfissaat pillugit inatsisartut inatsisaat naapertorlugu, Unammilleqatigiinnermut Nakkutilliisoqarfiup sioqqutsisumik neriorsuummik nalunaarutaa Naalakkersuisut suliarinninnissaannut ilanngunneqassaaq.

§ 2. Aningaasaliinissamut pilersaarummik saqqummiussineq Unammilleqatigiinnermut Nakkutilliisoqarfimmut tunniunneqassaaq.

§ 3. Aningaasaliinissamut pilersaarummik saqqummiussineq paasissutissanik allagaatinillu immersugassiami K2-mi allanneqarsimasunik imaqassaaq. Immersugassiaq K2-mut allagaatit ilaatinneqartut assilineqarneri ilanngunneqassapput.

Imm. 2. Noqqaassuteqartoqarneratigut immersugassiami K2-mi allanneqarsimasunik paasissutissanik allagaatinillu tunniussisussaataaerimut peqataannginnissaq Unammilleqatigiinnermut Nakkutilliisoqarfimmit akuerineqarsinnaavoq, suliap misissuiffiginissaanut taakku pisariaqanngitsutut Unammilleqatigiinnermut Nakkutilliisoqarfimmit nalilerneqarpata.

Imm. 3. Tigusinerup kingorna kingusinnerpaamik ulluinnaat qulinganni Unammilleqatigiinnermut Nakkutilliisoqarfimmit saqqummiussinerup tiguneqarnera uppersarsarneqassaaq.

Imm. 4. Saqqummiunneqartuni imaluunniit allagaatini ilanngunneqartuni paasissutissat amigartut Unammilleqatigiinnermut Nakkutilliisoqarfimmit paasineqarpata tamanna pillugu kommunimi oqartussat allakkatigut imaluunniit qarasaasiakkut Unammilleqatigiinnermut Nakkutilliisoqarfimmit ilisimatinneqassapput paasissutissanullu ilassutissaqarnermut naleqquttumik piffissamik aalajangiilluni.

Imm. 5. Kommunalbestyrelsi, sioqqutsisumik neriorsuummik nalunaaruteqarnissaq sioqqullugu, saqqummiussineri allanneqarsimasuni pissutsini annertuumik allannguisoqarnera pillugu, kommunalbestyrelsillu ilisimasaanik imaluunniit ilisimasariaqagaanik, kaammattorneqarnani ingerlaannartumillu Unammilleqatigiinnermut Nakkutilliisoqarfimmut nalunaaruteqassaaq.

§ 4. Kommunalbestyrelsip tamakkiisumik saqqummiussinerata kingorna kingusinnerpaamik sapaatit akunneri arfineq pingasut kingorna sioqqutsisumik neriorsuummik nalunaaruteqarnissaq pillugu Unammilleqatigiinnermut Nakkutilliisoqarfik aalajangiissaaq, § 3, imm. 1 aamma imm. 4 naap.

Imm. 2. Immikkut ittumik pisoqartillugu piffissaliussaq taanna Unammilleqatigiinnermut Nakkutilliisoqarfimmit sivitsorneqarsinnaavoq.

§ 5. Unammilleqatigiinnermut Nakkutilliisoqarfimmiit sioqqutsisumik neriorsuut kiisalu itigartitsissut nalunaarutigineqartoq, § 1, imm. 2 aamma 3 naap., tamanut saqqummiunneqassaaq, unammilleqatigiinneq pillugu inatsisartut inatsisaat § 15, imm. 2 naap.

Imm. 2. Sioqqutsisumik neriorsuummik aamma itigartitsineriimik nalunaaruteqarnerup tamanut saqqummiunneqarnera Unammilleqatigiinnermut Nakkutilliisoqarfiup nittartagaatigut pissaaq.

§ 6. Nalunaarut una 1. juli 2008-mi atulissaaq.

Namminersornerullutik Oqartussat, ulloq 27. juni 2008

/

Bent A. Sørensen

Ilanngussaq

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut